

# Doa untuk Baby Haqq

Semoga ada sinar  
buatmu sayang

NURUL FIRDAUS KHAIRI

MORIB

**K**elab Bella Wanita Muda Kuala Langat mengambil inisiatif melancarkan Tabung Kutipan Derma (*Fight Cancer for Baby Haqq*) seorang pesakit kanser jenis *Langerhans Cell Histiocytosis (LCH)* sempena Program Sukan Muda Kuala Langat yang diadakan di Pantai Morib, semalam.

Pengerusinya, Asuma Beevi Mohamed Sali berkata, selepas suami isteri terpaksa kuat semangat apabila anak ketiga mereka, Muhammad Aqkheer Al'Aerieq Mohd Nazib, atau lebih mesra dengan panggilan Baby Haqq yang kini berusia setahun lapan bulan memerlukan bantuan untuk mendapatkan rawatan susulan kemoterapi dan pelbagai rawatan lain.

Menurutnya, ibu kepada Baby Haqq, Norhijah Abd Samat, 36, yang tinggal di Kampung Sungai Buaya, Kuala Langat merupakan salah seorang ahli jawatankuasanya, sekaligus mengambil peluang untuk memberi bantuan melalui program yang julung kalinya diadakan di Pantai Morib.

"Saya



Sulaiman sempat beramah mesra bersama Baby Haqq selepas pelancaran *Fight Cancer For Baby Haqq*.



Baby Haqq semasa menjalani rawatan di HKL.

harap ramai pihak dapat membantu meringankan beban keluarga berkenaan.

"Dalam pelancaran itu juga kita turut melancarkan jualan *t-shirt fight cancer for Baby Haqq* yang akan dijual di Facebook," katanya.

## Ibu gembira ramai pihak prihatin

Norhijah dan suaminya, Mohd Nazib Mohd Supian, 36, ketika ditemui memberitahu sejak disahkan menghidap LCH pada Jun 2016, Baby Haqq sebenarnya sudah beberapa kali mengalami siri perubahan dalam dirinya.

Menceritakan keadaan anaknya, Baby Haqq sebenarnya seorang anak yang aktif dan ceria namun ketika berusia empat bulan tahap kesihatannya mula merosot.

"Apa yang kami buat, bersikap positif selalu dan tingkatkan kekuatan



Pelancaran Tabung Kutipan Derma untuk Baby Haqq.

untuk berjuang bersama Baby Haqq sehingga ke hari ini walaupun terpaksa menjadikan Hospital Kuala Lumpur itu sebagai rumah kedua kami," katanya ketika ditemui *Sinar Harian*, semalam.

Norhijah berkata, suaminya hanya bekerja sebagai pemandu lori dengan pendapatan RM1, 800. Dengan sejumlah wang yang ada mereka mengambil keputusan untuk mendapatkan rawatan kemoterapi di Institut Pediatrik HKL untuk merawat penyakit kanser yang dihidapi anaknya.

Baby Haqq sebelum ini pernah dimasukkan ke unit rawatan rapi (ICU) kerana berdepan dengan komplikasi dalam badan.

"Akak dan suami kena berusaha menanggung kos perubatan termasuk kemoterapi dan susu khas Baby Haqq kira-kira RM500 ke RM800 sebulan.

"Pada masa sama akak tak bekerja jadi suamilah yang terpaksa menyara dua lagi anak berusia sembilan dan 10 tahun," katanya.

**Doktor sahkan Baby Haqq dah 'tiada'**

Paling menyedihkan, dalam jangka masa dari awal tahun berkampung di hospital, doktor sudah empat kali sahkan Baby Haqq sudah tiada selepas nafasnya terhenti.

Katanya, hanya Tuhan sahaja yang tahu apa perasaan seorang ibu di saat menerima pengesahan doktor, namun baginya keajaiban boleh berlaku dan pernah satu masa doktor sahkan degupan jantung Baby Haqq berhenti dan sudah tiada.

Katanya, dia sendiri melihat keadaan fizikal anaknya apabila tiub yang ada ditanggalkan dan ALLAH maha mendengar doanya apabila Baby Haqq menarik nafas sedalam-dalamnya dan ketika itu sekumpulan doktor dan jururawat menyambung semula bekalan oksigen kepada Baby Haqq.

"Saya tak tahu nak kata apa melainkan bersyukur Dia memberi peluang Baby Haqq untuk terus hidup bersama kami.

"Saya anggap Baby Haqq ni istimewa dan dialah sumber kekuatan saya dan suami. Ni 19 Mac nanti Baby Haqq akan dimasukkan semula ke HKL untuk menjalani pembedahan kali keenam, cuma kali ni

**info** • Sumbangan kepada Baby Haqq boleh disalurkan melalui akaun CIMB Norhijah Abd Samat: 7007208178

doktor akan memasang satu alat dinamakan *chemo pot* di bahagian dadanya dan pembedahan kali ini pun saya masih bimbang," katanya yang sedikit trauma apabila Baby Haqq pernah berdepan dua kali koma.

Pasangan ini juga memohon kepada seluruh rakyat Malaysia bersama-sama untuk mendoakan kesejahteraan Baby Haqq.

Hadir sama dalam pelancaran *Fight Cancer for Baby Haqq* termasuklah, Pengerusi Pembangunan Persekutuan Parlimen Kuala Langat, Datuk Sulaiman Mohd Karil, Pengerusi Bella 4B Kuala Langat, Hafez Shuriddin dan Ketua Pemuda Umno Kuala Langat, Mohd Jefrizal Mohd Jaafar Ketua Pemuda MIC Kuala Langat, R. Sriheran.

